

Polgo Pas Filemonba Aşani Hasia nedebo tau sabo po

Te me sogo Pol kalabus tomode bidibadi tama aga te kalabusde bidali gasa bidi nogi Onesimus suali. Te Onesimus polobadu te Kolosi moni hanude bidama, tama aga te bidi Filemon aga masigi sisabo olo se ebo bidi bidali. Tiali goli aga wi peyu, tama gasaba pelama, te Pol kalabus bidibo digi sabolali. Tama Polgo agabolo Kraisgo po pusa menama, tama Onesimus aga homu hasegelama, te aga yali dwai se tudiba munama, te Kraisgo po wali pabo bidi pedalali. Tama Polgo Onesimus te aga tonalubo bidi Filemon tebola ma tagala palainogo eyu, tama agai e pas aşeyu tama Onesimusgo nogoba muani. Agai homugo te Filemon agai Onesimus dali sebeş esiaşu tama aga bugagia sao wali. Tama Pol nosali te Filemon bidibo digi asaibao, te po me aşena tolali.

**Filemango olo se ebo bidi wi
pali, tama nosali aga Godigo po
wali pabo bidi pedelai, tama
Polgo te bidi aga te Filemon
bidibo digi ma tagala palali po**

¹ Ena Pol da. Tama eno we bidibolo Krai Jisasde po weyu, tama augwali mebago hagela eyu, tama augwaligo ena kalabus beba muani. Tama ena te kalabus bede bidibadi, te ena dali, dago abagi Timoti dali, da sigo e pas aşenama,

Filemon nagebolo tolobao. Nage dago dwagi yai abagi mu, da dali deli şe ebo bidi dao. ² Tama da sigo e po te we Apiabolo me, te bidi Arkipusbolo me aşai. Tama Arkipus agai te we bidi tau sabo şede te aga bomu eyu te tau sabo şe ebo dao, ami bidigo bomu eyu hwıbo te tiwai ebo dao. Tama da sigo nago beba sisinibo Godigo po wali pabo we bidibolo me e po aşbao. *

³ Eno homugo dago Aya God dali, te Genuai Bidi Jisas Kraıs dali, augwali sigo dage olo tau sabo kolesaga te homu dage dali bidimainao, dage dwagi yai homu eyu bidimainogo hagede.

Filemon agai dwagi yai kolesaga ebo dao

⁴ Eno abagi Filemon, eno Godibolo eno gedu haluasa po weyu, eno nago nogi wabo si, sesemane sogo eno Godibolo bubu hwi wabo dao. ⁵ Magi basowe? Sesemane sogo eno odali augwaligo nagede po weyu, nago te Genuai Bidi Jisasbolo dwagi yai homu eyu, tama nago konealubo po agade daş wai. Tama tiyu nago Godigo we bidi tigidalibolo dwagi yai homu eyu, tau sabo dao, te po me eno odali. ⁶ Tama eno Godibolo gedu haluasa po weyu, eno te homu ebo dao: da dena homu Jisasba muyu, te da nage dali wadolobo dao. Tama tiyu, eno homugo dago Jisasde konealubo po daş wabo kolesaga ebogo nage ola momainao. Tama ola menama, tama God agai da Jisasde wadolali we bidi da dali yabo dwagi yai şe page nago gisiga mu koneaibao. Te homu eyu, eno Godibolo hanalu wabo dao. ⁷ Eno dwagi yai ama, Godigo we bidi tigidali

* **1:2:** Kol 4:17

nago augwali dali dwagi yai homu eyu, godolo mu ebo dao. Tama tiyu, nago te kolesaga eyu, augwaligo homu pua peyu, dwagi yai ilai. Tama te kolesaga ebode ena dwagi yai homu elama, tama eno moni homu me esişyu, te eno homu dwagi yai elama bidibao.

Filemon agai Onesimus te aga ama ma oda sabo tiwai yao

⁸ Te nago te we bidi tau sabo şe ebaso, eno te homu elalubo dao: Te Kraigo nogi te bomode eno te po bomo elama, nagebolo weyu te nage wiegi yai doloba pai kolesaga me yainogo wagi sogo da, tama tiyu eno po nago wali pigi dao. ⁹ Tiali goli eno homugo nago te kolesaga emainogo te eno nagebolo te bomo elalubo po wagobeo. Menio. Dago dena hasi wiegi yai homu eyu godolo ebo homu eyu, tama da deliba wadolama bidibao. Tama tiyu, eno nage dali po bomo elama wabo homu eno egobeo, te eno duadigi nage dali hanaluyu te po obao. Ena Pol, ena da Godigo po sela pabo bidi dao, tama Krai Jisas tobade augwaligo ena kalabus beba munama, megi tede bidibao. Tama ena te Pol, tiali digi, eno nagebolo te po bomo elama wagobeo. ¹⁰ Tama tibaso, “Abagi aga tau saibao,” homu eyu, eno te bidi Onesimus tobade megi nage dali eno hanalu obao. Tama ena te kalabus bede bidibadi, te bidi Onesimus aga me te kalabus bede bidai. Eno agabolo Godigo po pusulama, tama Onesimus agai te po bugagia odama, aga homu begelama, tama aga Godigo hani bidi pedalali. Tama tibaso, megi aga da eno

ogwa tiwai dao. * ¹¹ Tama polobadu Onesimus aga nage dali bidali sogo aga nago olo şe ebo bidi bidiyu, tama aga hagela eyu, tama aga nage tau sisabo bidi bidai. Tiali goli megi da, aga nage dali ena dali tau sabo bidi mu bidaibao.

¹² Te eno te bidi Onesimus dali dwagi yai homu eyu godolo mu ebo digi, megi eno aga nage pageba ma tagala palobao. ¹³ Tama eno homugo agai ena tau somainogo aga ede ena dali bidimainao, homu yali. Eno Godigo gesi dwagi yai po te we bidibolo pusubaso, augwaligo ena e kalabus beba muani. Tama ena ede bidibadi nage digibulu bidiyu, nago ena tau sabo usu şabaso, eno homugo Onesimus aga e hanude bidiyu agai ena tau somaina homu yali. ¹⁴ Tiali goli nago te usu da po wasiabaso da, te eno aga ede bidao wagobeo. Eno nage dali homo egobeo. Menio. Eno homugo nago dwagi yai şe eyu, nago homugo Onesimus agai ena tau siyu ede bidiyu bidimainogo homu eyu da, nago te homu usu eyu da, te aga ede bidiyu ena tau saibao.

¹⁵ Te Onesimus wi peyu, agai nage tagalama, osogo eba bidagasai. Magi basowe? Nago aga ma siyu, tama aga nage dali mu bidaibao, eno te homu ebao. ¹⁶ Tama megi aga te olo şe ebo bidi naga ma egobeo. Menio. Da bidi sela Genuai Bidi Jisasde wadolobaso, te bidi Onesimus aga da te da sigo ama mu dao. Tama megi aga dago ama mu gagawali, dago dwagi yai homu aga dali ebo dao. Te eno digi aga dali te eno ama mu te homu eyu, aga dali wiegi yai homu ebo dao. Me ma, nago eno ebo homu aiyaba elaluyu, tama

* **1:10:** Kol 4:9

nago te homu eyu, aga nago şe ebo bidi bidiyu, te me nago ama dao, tama nago aga dali dwagi yai homu elama, godolo mu yao.

¹⁷ Te nago homugo ena te Kraisgo şede age name si ebo tiwai homu eyu da, te aga nage pageba ma asobo si, te nago Onesimus bugagia ma sao, te nago ena dali wiegi yai homu ebo gilama te nago Onesimus dali me wiegi yai homu eyu aga ma sao. ¹⁸ Tama agai nage dali dwai şe me elama, tama agai nage dali negeli elaluyu da, teda nago agai te negeli ilali hasegelama, eno nogi tede muao. ¹⁹ Ena Pol, ena digi eno e po eno nogogo aşai, ena digi eno te Onesimusgo negeli ma wei ponaibao. Tama eno nagebolo Godigo po polobadu ola magi menigi sogo da, teda te şede nago ena dali genuai negeli elalugi menigi da. Tiali goli megi eno te genuai negelide po wagobeo. ²⁰ Eno ama, te Genuai Bidi Jisago nogi tobade nago enabolo te wiegi yai homu nagame ilao. Tama da si te Krai agai şe ebo bidi bidai, tama tiyu nago te ebo dwagi yai kolesaga te Onesimusde eyu, te nago eno homu wiegi yai pua pomainogo tama tiaio.

²¹ Eno te homu bomu ebogo da, te nago eno te po wali pabo homu ebao. Tama tiyu eno nago Onesimus tau sao po nagebolo aşena tolobao. Eno koneani, nago yabo te kolesagago megi eno nagebolo te yao wabo kolesaga te aiyaba elaluama, tama nago te Onesimus dali nosali ebo kolesaga te wiegi yai mu yaibao. ²² Tama tiyu, eno po me deli elalubao. Te eno homugo dagego gedu haluasa po wabo te Godigo odabo homu yaibao. Tama tiyu, agai ena dagebolo ma maiabo

homu yaibao. Tama tibaso, ena nage dali bidabo be tomode daj togwali te ena bidabo digi sisi elama elaluao.

²³⁻²⁴ Te bidi Epafra aga ena dali e kalabus bede bidibao. Da sigo Krai Jisago se ebaso, augwaligo da si kalabus beba muani. Tama Epafra dali, Mak dali, Aristarkus dali, te Demas dali, te Luk dali, te bidi tigidali augwaligo ena dali Krai sigo se ebo bidi dabe dao. Tama tiyu, augwaligo nagebolo nage tao po obao. *

²⁵ Eno homugo te dago Genuai Bidi Jis Krai agai we bidi olo mu tau sabo kolesaga dage tigidalide bidimainao. Tama dao.

* **1:23-24:** Tpi 12:12, 25; 13:13; 15:37-39; 19:29; 27:2; Kol 4:10

Godigo dwagi yai po buku
The Holy Bible in the Dadibi Language of Papua New
Guinea
Buk Baibel long tok ples Dadibi long Niugini

copyright © 1987, 2001 Wycliffe Bible Translators, Inc.

Language: Dadibi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-22

PDF generated using Haiola and XeLaTeX on 11 Nov 2022 from source files dated 9 Oct 2020

f3fb5335-7c77-5120-883d-cc05478d7362